



# Bilten

mjesečni



april  
travanj  
2023.

287

omladinska mreža bosne i hercegovine  
ISSN 2831 - 0845

## Dragi prijatelji/ce,

Predstavljamo vam aprilsko izdanje (broj 287.) mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine.

Bilten izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

[www.orctuzla.ba](http://www.orctuzla.ba)



### SADRŽAJ

Aktivnosti u aprilu.....	2
Planovi za maj.....	7
Aktivnosti članova mreže.....	8
Saopštenja/informacije/donatori/pozivi.....	14

Uživajte u čitanju!

## AKTIVNOSTI ORC/HCA U APRILU



### „Naša zajednica – naša odgovornost“



Fondacija tuzlanske zajednice potpisala je ugovore o podršci 23 građanske inicijative za koju su izdvojili više od 72.000 KM, a koje će udruženja građana i udruženja mladih provesti u 2023. godini. Među odobrenim projektima je i projekat Omladinskog resursnog centra Tuzla pod nazivom "Moj zeleni otisak". FTZ je ovoga puta, između ostalog, podržala međuentitetske projekte u Teočaku, projekat edukacije o

osnovama znakovnog pisma za policajce i zdravstvene radnike u Banovićima, projekat uvođenja šaha u škole u Gradačcu, inkluziju osoba sa invaliditetom u Čeliću i brojne druge.

Podrška se realizuje kroz projekat "Naša zajednica je naša odgovornost", kojeg provodimo uz podršku USAID-a BiH, u okviru programa #SnagaLokalnog.



### CAT Bosna i Hercegovina

Tokom mjeseca aprila, nastavili smo sa našim redovnim aktivnostima u sklopu projekta „CAT – Bosna i Hercegovina“.

Naše mačke su nastavile da oduševljavaju javnost na društvenim mrežama sa mnogo meme-ova, poziva na seminare, pozitivnih priča o mladima iz Bosna i Hercegovine.

Ukoliko još uvijek ne pratite naše mačke – pozivamo vas da to učinite na:

[Facebook](#), [Web Portal](#), [Instagram](#) i [Youtube kanal](#).

## Kad uđem u poštu i vidim koliki je red...





## Evropska Unija – radionice o zagovaranju



Hvala **Evropskoj Uniji** na pozivu da provedemo dan sa mladima i da zajedno učimo o razvoju politika, procesu zagovaranja, umrežavanju i jačanju partnerstava.

Šta je zagovaranje? Kako mladi mogu uspješnije učestvovati u procesu donošenja odluka? U Mostaru, Prijedoru, Sarajevu i Tuzli, zajedno sa **#OCD** i **#YEA** (mladim evropskim ambasadorima) razgovarali smo o ovim važnim temama.



## CAT BiH i RTVTK – „Aktiviraj se!“

Ove sedmice smo se družili i sa mladima u Kalesiji i Banovići, te smo pričali o njihovim dosadašnjim aktivnostima u skopu naše nove rubrike na RTV TK pod nazivom "Aktiviraj se!".



Sve dosadašnje emisije možete pogledati klikom [ovdje](#).

Ovaj sadržaj se realizuje kroz **Bosnia and Herzegovina Resilience Initiative (BHRI)**, projekat kojeg implementira **Međunarodna organizacija za migracije (IOM)**, a finansira **Austrijska razvojna saradnja**.



## CAT Kviz Čapljina

Još jedna uzbudljiva noć kvizova u Craft caffe! Hvala svim ekipama koje su se pridružile u sinoćnjoj noći kvizova u Čapljini! Bilo je mnogo smijeha, uzbuđenja i naravno, opšteg znanja! Čestitke pobjednicima, timu **In Diana Jones!**

„Ovi kvizovi se sprovode u saradnji sa **Bosnia and Herzegovina Resilience Initiative (BHRI)** projektom, koji sprovodi **Međunarodna organizacija za migracije (IOM)**, uz finansijsku podršku **Austrijske razvojne saradnje.**“



## CAT Kviz Čitluk



Još jedna noć kvizova je uspješno realizovana u **Evergreengrin u Čitluku!** Tim **“Vriilo”** je odnio pobjedu nakon napete borbe sa timovima **“Faulkoš”** i **“Jure Van Ekipe”**. Čestitamo pobjednicima, ali i svim ekipama na odličnoj igri i zabavi!

„Ovi kvizovi se sprovode u saradnji sa **Bosnia and Herzegovina Resilience Initiative (BHRI)** projektom, koji sprovodi **Međunarodna organizacija za migracije (IOM)**, uz finansijsku podršku **Austrijske razvojne saradnje.**“




## Panel diskusija – Uloga medija i nevladinih organizacija u jačanju pravosudnog sistema


Panel diskusija - Uloga medija i nevladinih organizacija u jačanju pravosudnog sistema koju je organizovao **JaBiHEU** zajedno u partnerstvu sa **ORC Tuzla** u sklopu projekta **Mladi za vladavinu prava**.

*„Iznenadujuće je da mladi ljudi, učesnici panela, unatoč deprimirajućim prilikama u državi, pokazuju interes za procese u pravosuđu, da prepoznaju slabosti pravosuđa i da su motivirani da daju doprinos u njegovom unaprjeđenju. Posebno mi je drago da shvataju opasnost od širenje netačnih i nepouzdanih informacija o pravosuđu i sudskim procesima i da su usmjereni prema profesionalnim medijima. Laska nam da ste nas prepoznali kao važan izvor informisanja o pravosuđu.”*, naglasio je Azhar Kalamujić,

Iz Centra za istraživačko novinarstvo. Projekat finansira **Evropska unija**.



## Panel – „Mladi i pravosuđe“



**Mladi i pravosuđe - vraćanje povjerenja mladih u pravosudne institucije BiH** bila tema je panela održanog u sklopu projekta **Mladi za vladavinu prava**. Panelistice Udruženja žena sudija BiH, **Amela Mahić Samardžić** i **Ajna Papović Mujan** razgovorale su sa mladim ljudima o njihovom viđenju vladavine prava i samog odnosa mladih ljudi prema pravosudnim institucijama.

*“Učesnici su dobili izvrsnu priliku da direktno razgovaraju sa sudijama. Uz to, priručnik Vladavina prava je kruna i vrhunac rada na ovom projektu, on je idealna publikacija iz koje možemo naučiti sve o osnovnim ljudskim pravima i pravu. Urađen je vrlo pristupačno jezikom koji svi mogu da razumiju.”*, kazao je Borislav Marić jedan od učesnika panela.

Saradnja mladih i pravosudnih institucija od velikog je značaja čemu upravo svjedoči projekat #mladizavladavinuprava koji realizuju JaBiHEU i ORC Tuzla. Projekat finansira Evropska unija.



## YinfoPioneers - Pionirske informativne usluge za mlade na Zapadnom Balkanu



U Barceloni je, u periodu od 20. do 21. aprila održan sastanak Konzorcijuma projekta YinfoPioneers – Pionirske informativne usluge za mlade na Zapadnom Balkanu.

Tokom dvodnevnog sastanka razgovaralo se o dosadašnjim aktivnostima u okviru projekta, ali su i planirane dalje aktivnosti:

- Održavanje „Dana dijaloga“ na kojima će se rezultati fokus grupa održanih u prethodnom periodu prezentovati omladinskim radnicima i političkim subjektima, ali i medijima;
- Priprema ALTYO treninga, koji će biti održan u Strugi (Sjeverna Makedonija) od 19. Do 23. Juna. NA ovome treningu će učestvovati po pet izabranih mladih iz svih organizacija partnera u projektu, a poziv za učestvovanje će biti objavljen tokom maja;
- Izrada strategija za razvoj i koordinaciju Omladinskih Info Centara u zemljama zapadnog Balkana.



Drugog dana sastanka partneri su imali priliku da posjete organizacije u Barceloni koje se bave pitanjima informisanja mladih:

**Espai Jove Cerdanyola** – omladinski centar, **PIJ La Fletxa - Premià de Dalt** (omladinska informativna tačka), Omladinska kancelarija i savjetodavni centar (**CIAJ**), i **Katalonska omladinska agencija Barcelona**. Tokom studijske posjete smo se upoznali sa radom i aktivnostima ovih organizacija, te uslugama koje one pružaju mladima.

## REDOVNE AKTIVNOSTI ORC I HCA TUZLA

Tokom aprila smo radili na održavanju i razvoju komunikacija i koordinacije unutar Omladinske mreže Bosne i Hercegovine ([www.orctuzla.ba](http://www.orctuzla.ba)). U okviru toga smo svakodnevno na mejling listu mreže ([omladina@orctuzla.ba](mailto:omladina@orctuzla.ba)), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

## PLANOVI HCA/ORC-A ZA MAJ 2023.



Nastavak ostalih aktivnosti u okviru projekta CATNet.

Ovaj projekat je realiziran zahvaljujući podršci **Bosnia and Herzegovina Resilience Initiative (BHRI)**, projekat kojeg implementira **Međunarodna organizacija za migracije (IOM)**, a kojeg finansira **Austrijska razvojna saradnja**.



Uprilike za organizovanje ALTYO treninga u Strugi – Sjeverna Makedonija. U okviru ovoga ćemo poslati pozive za prijave mladima u BiH



Početak implementacije projekta „Constructing peace and security“, otvorili smo poziv za učešće na konferenciji mladih u Sarajevu, koja će se održati **25. - 26. maja 2023. Godine u Parlamentarnoj skupštini BiH u Sarajevu**.

Prijaviti se možete na sljedećem linku:

[https://docs.google.com/forms/d/e/1FAIpQLScPXxryvpP\\_AAUsLwI4h6JSjO1W4hDbwe\\_xugz\\_4VwQgEr-tA/viewform](https://docs.google.com/forms/d/e/1FAIpQLScPXxryvpP_AAUsLwI4h6JSjO1W4hDbwe_xugz_4VwQgEr-tA/viewform)



Početak implementacije projekta "Moj zeleni otisak", podržanog od strane Fondacije Tuzlanske Zajednice (FTZ). O aktivnostima u projektu bićete pravovremeno obaviješteni u našim glasilima.



## AKTIVNOSTI ČLANICA OMLADINSKE MREŽE BiH

Institut za  
razvoj mladih KULT



4<sup>th</sup> Viteške brigade

34 – 36 BA, 71210 Ilidža,  
Sarajevo

Tel: +387 33 778 778.

Fax: +387 33 778 79

E-mail: [kult@mladi.org](mailto:kult@mladi.org),

web: [www.mladi.org](http://www.mladi.org)



**Preko 120 mladih ljudi pokazalo interesovanje za aktivnosti Instituta za razvoj mladih KULT**



STARfest, prvi festival za razvoj karijere ponudio je odličan program za mlade, preko 50 izlagača, 30 inspirativnih govornika, veliki broj edukativnih radionica, te brojne korisne informacije kad je riječ o tržištu rada i konkretne ponude za mlade (prilike, poslovi, stipendije, edukacije i sl.).

Institut za razvoj mladih KULT bio je dio ove priče, a uposlenici Instituta uživali su u dvodnevnom druženju s mladima, upoznavajući ih bolje s programima Instituta i prilikama koje su dostupne svim zainteresiranim mladim ljudima. Razmjena informacija, mišljenja i interesa posebno će biti korisna u kreiranju nekih novih prilika za mlade. Pitanja su bila vrlo raznolika, u skladu s

interesovanjima mladih, a ono što ih je posebno zanimalo jest kakav je program obuka koje provodi Institut i kakva znanja tu mogu steći, kako mogu postati polaznici Institutovih obuka, te na koji način se mogu detaljnije informirati u budućnosti o radu Instituta i prilikama koje pruža mladima. U toku ova dva dana, preko 120 mladih ljudi pokazalo je interes za programe Instituta za razvoj mladih KULT i izrazilo želju da bude dio aktivnosti koje će Institut organizirati za mlade u budućnosti.

Određeni broj mladih koji je već bio na događajima koje je organizirao Institut, rekao je da želi biti dio budućih aktivnosti. Učešće na STARfestu bilo je odlična prilika za Institut da se poveže i upozna s brojnim mladim ljudima, s novim potencijalnim partnerima i saradnicima, a sve to s ciljem kreiranja bolje budućnosti za mlade u Bosni i Hercegovini.



## Sarajevo se nastavlja pripremati za aplikaciju za Europsku prijestolnicu mladih 2026!

Gradonačelnica Benjamina Karić sastala se sa predstavnicima udruženja za mlade i vijeća mladih koji podržavaju Grad za aplikaciju Sarajevo - Europska prijestolnica mladih 2026.

Razvoj kvalitetnih i održivih politika prema mladima, te prilika koje uistinu mijenjaju živote mladih u Sarajevu i Bosni i Hercegovini je pravac koji Sarajevo slijedi, a koji će biti intenziviran u narednom periodu. Tim povodom Gradonačelnica je ugostila predstavnice Instituta za razvoj mladih KULT, predstavnike Udruženja za socijalni, kulturni i kreativni razvoj ZORA, Vijeća mladih FBiH i Vijeća mladih Općine Novo Sarajevo, kako bi razgovarali o nastavku saradnje i radu na inicijativi Sarajevo - Europska prijestolnica mladih 2026.



Sarajevo je ušlo u uži izbor za prestižnu titulu Europska prijestolnica mladih 2026, a taj uspjeh između ostalog je i rezultat odlične saradnje Grada Sarajeva sa udruženjima koja su podržala ovaj proces i uložila svoje resurse kako bi zajedničkim naporima osigurali da se i Sarajevo nađe na listi najuspješnijih gradova u Europi.

Na sastanku su predstavljene politike prema mladima i njihova važnost, kao i značaj uključivanja mladih u procese poput aplikacije za Europsku prijestolnicu mladih. Razmatran je koncept ko-menadžmenta i značaj mladih u procesima aplikacije i provedbe.

Gradonačelnica Karić će, u narednom periodu, imati ključnu ulogu u promociji Sarajeva kao prijestolnice mladih u Europi, te će se organizirati zajednički događaji i poslati poruke za širu javnost. Sama titula za Sarajevo bi značila više ulaganja u programe za mlade koji će položaj mladih učiniti boljim.

Sarajevo se nastavlja pripremati za aplikaciju za Europsku prijestolnicu mladih 2026, a mladi će imati ključnu ulogu u procesima aplikacije i provedbe titule. Najvažnije što ova titula donosi jeste održivost, konkretan rad i ulaganje u mlade, te uključivanje mladih u odlučivanje, jer mladi imaju znanje, ideje i prijedloge za bolje bosanskohercegovačko društvo.



## Konferencijom “Zajedno za dobre i održive politike prema mladima” do novih prilika i ideja

Konferencija **Zajedno za dobre i održive politike prema mladima** održana je 25.4.2023. a fokus konferencije bio je na učešću i uključenosti mladih u rad komisija za mlade na svim nivoima (općinskim, gradskim, kantonalnim i entitetskim), te na kreiranju budžeta za mlade.

Gosti panela bili su političari svih nivoa vlasti. Tema prvog panela bila je Učešće mladih u odlučivanju: prilike i pozitivna praksa, a na panelu se razgovaralo sa **Nedimom Alibegovićem** koji je obnašao funkciju generalnog sekretara Vijeća mladih FBiH, predsjednikom komisije za pitanja mladih Parlamenta Federacije BiH **Eldarom Čomorom** i predsjednicom UO Omladinskog savjeta Republike Srpske, **Dijanom Gašić**.

Predsjednik komisije za pitanja mladih Parlamenta Federacije BiH Eldar Čomor prenio je pozitivna iskustva sa tematske sjednice koja može poslužiti kao primjer učešća mladih u procesima odlučivanja, te istakao nastojanje komisije da i u narednom periodu saraduje sa krovnim tijelom za mlade u Federaciji BiH, u cilju poboljšanja položaja mladih i važnosti uključivanja mladih u komisije.



Na drugom panelu razgovarano je sa predstavnikom Službe za obrazovanje, kulturu i sport iz Općine Novo Sarajevo Merimom Serdarevićem o budžetu za mlade, a nakon toga prisutni su dobili zadatak u grupama prepoznati izazove pri kreiranju budžeta za mlade i pronaći najbolja rješenja za prevazići te izazove. Učesnici su se složili kako je ova konferencija bila vrlo korisna za sve njih, te da je razmjena znanja i iskustava uvijek korak naprijed ka boljim prilikama za mlade u zajednici.

Ovom konferencijom Institut nastavlja razvijati i zagovarati pravna i druga strateška rješenja, te graditi i jačati kapacitete udruženja i vlasti u BiH i regiji, za uspješne i održive politike prema mladima, što je moguće postići samo zajedničkim angažmanom predstavnika institucija vlasti odnosno političara koji djeluju na različitim nivoima vlasti u Bosni i Hercegovini kao i predstavnika nevladinih organizacija koje rade sa mladima.



## OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: [svitac@gmail.net](mailto:svitac@gmail.net)

Web: [www.svitac.org](http://www.svitac.org)

FB: [www.facebook.com/omladinska.svitac](https://www.facebook.com/omladinska.svitac)



### Dnevne radionice

Omladinska organizacija Svitar je nastavila sa svakodnevnim interaktivnim i online aktivnostima. Mlađi učesnici su radili kreativne i edukativne stvari prilagođene uzrastu, uz pomoć lokalnih i međunarodnih volontera. Ovaj mjesec su razgovarali o proljeću, insektima, cvijeću, papagajima, sirenama i suncu. Učesnici su uživali u pravljenju leptira, gusjenica, meduza, žaba, zečeva i ukrasa za kačenje, kojima su ukrašavali zidove radionice. Nastavili su i sa muzičkim radionicama, uvježbavanjem ritmova i pjesme o lisici i visibabi. Nastavili su sa abecedom i naučili da pišu slova K, L, M, Lj, N, O. Radili su vježbe zagrijavanja i jogu za djecu, a svakog su četvrtka plesali i vježbali slušanje priča. Neke od priča koje su pročitali ovog mjeseca su: Ljepotica i zvijer, Snjeguljica, Pepeljuga, Mala sirena i Palčica. Cilj ovih edukativnih aktivnosti je da djeca razviju maštu i da koristeći razne materijale izraze svoju kreativnost, te da razviju motoriku, pamćenje, osjećaj tolerancije i poštovanje prema drugima i usvoje lijepo ponašanje. Sve radionice su implementirane uz edukativnu vizuelnu metodu sa slikama i videom.



Uzrast 13+ je učestvovao u diskusijama/radionicama na teme: rasizam, diskriminacija, sreća, zaštita klime i životne sredine, opasnosti od lakih i teških droga, prednosti i nedostaci dijeljenja stana sa cimerima. Na ovaj način želimo mladima pružiti siguran i neutralan prostor, u kojem mogu reći svoje mišljenje.

Na engleskim i njemačkim radionicama su učili modalne glagole (moći, morati i htjeti), osnove deklinacije pridjeva, ponavljali vokabular iz prošlih mjeseci i glagole u sadašnjem vremenu, pisali diktate, čitali i

prevodili kratke tekstove i fraze, radili na vježbanju svakodnevne komunikacije i gramatike, učili novi vokabular, te radili na zanimljivim prezentacijama i projektima.



## Radionice gitare

Učesnici su nastavili raditi na zahtjevnijim gitarskim kompozicijama kao što su „Capriccio br. 23 i 24“ (L. Legnani), „Travels“ (Pat Metheny), ali i na manje zahtjevnim vježbama J. Sagerasa.



## Radionice sambe

Učesnici su uvježbavali jedanaest kompozicija na kojima je rađeno posljednjih mjeseci i počeli su raditi na tri nove kompozicije: „Little being“, „Harvest time“ i „Plough“.



## Međunarodni dan nultog otpada

Za Međunarodni dan nultog otpada iskoristili smo priliku da sa mladima održimo radionicu diskusije, na kojoj se govorilo o zaštiti klime i okoliša. Lenja, koordinatorica radionice, je u uvodu pričala o dvije teme: šta je princip nultog otpada i šta je ‘Earth Overshoot Day’. Nakon uvoda, grupa je podijeljena u dva tima kako bi igrali ekološki kviz o zagađenju i potrošnji resursa. Nakon završnog pitanja u kvizu, učesnici su razgovarali o plastici u okeanima. Nakon toga su imali tzv. tihu diskusiju. Dobili su četiri pitanja, napisana na posteru: *Da li su klimatske promjene i zaštita okoliša problem u Bosni i Hercegovini/Njemačkoj?*, *Da li je zaštita klime i životne sredine važno pitanje?*, *Šta možemo učiniti da zaštitimo klimu i životnu sredinu?*, *Šta država treba da uradi da zaštiti klimu i životnu sredinu?* Učesnici su imali vremena da na posterima napišu svoje mišljenje o pitanjima i pročitaju ono što su drugi napisali. Ova razmišljanja su podijeljena u grupi i učesnici su imali živu diskusiju na temu ekologije, što je ujedno bio i cilj ove radionice. Ovo je takođe bilo interesantno jer su grupu sačinjavali mladi iz BiH i Njemačke, te su mogli razmijeniti iskustva iz svojih zemalja. Drugi cilj ove radionice je, naravno, bio da se skrene pažnja na problem zagađenja i stvaranja otpada i pokrenu ekološke inicijative.



## Međunarodni dan djece ulice

Svake godine, 12. aprila, Međunarodni dan djece ulice daje glas upravo djeci koja žive na ulici, te podsjeća da se njihova prava ne mogu zanemariti. Omladinska organizacija Svitar je ovaj dan obilježila sa najmlađim učesnicima! Radionica je bila veoma kreativna i zabavna – napravili su “Sretnu kuću” za svako dijete koje nema gdje da živi, a sa učesnicima se razgovaralo i o važnosti sigurnog doma i porodice. Osim toga, naši najmlađi su nacrtali i svoju kuću i napravili nebudere sa Lego kockicama.



## Dan planete Zemlje

Dan planete Zemlje je godišnji događaj koji se obilježava 22. aprila, a kojim se demonstrira podrška zaštiti životne sredine. To je ujedno i naš jedini dom i potrebna joj je naša pomoć da bi se održala! Svi bismo trebali učestvovati u aktivnostima poput zaštite prirode, brige o rijekama i morima, sakupljanju smeća i sadnji drveća! Omladinska organizacija Svitar obilježila je Dan planete Zemlje sa najmlađim učesnicima! Pogledali smo dva videa o našoj planeti Zemlji i naučili kako da je sačuvamo i zaštitimo. Naši najmlađi su također bojali radne listove i napravili divan poster planete sa cvijećem i lišćem kao dekoracijom. Radionica je održana u prostorijama Omladinskog centra Brčko distrikt BiH.

Za maj se planira nastavak svih aktivnosti Omladinske organizacije Svitar.

## INFORMACIJE / NAJAVE / DONATORI / POZIVI

### “Živa biblioteka” - poziv

Dragi/e,

Pred Vama se nalazi obrazac prijave za učešće na projektu “Živa Biblioteka” koju organizuju Naida Hajro i Merjem Mašić u podršci sa nevladinim organizacijama Društveno-Kulturni Centar Sarajevo, Sarajevski otvoreni centar, Fondacija CURE, Fondacija Krila nade i Helsinški parlament građana Banja Luka.

Živa biblioteka je interaktivni koncept koji potiče dijalog i razumijevanje između različitih skupina ljudi u svrhu rušenja postojećih stereotipa i predrasuda prema manjinskim zajednicama. Zasniva se na ideji gdje sudionici imaju priliku “posuditi knjige” sa kojima se mogu upoznati i razgovarati. Svaka “knjiga” u živoj biblioteci predstavlja osobu koja ima specifično iskustvo ili perspektivu na neku temu, kao što su npr. nacionalnost, religija, migracija, mentalno ili fizičko zdravlje, rodni identitet, seksualnost ili nekonvencionalan način života.

Učestvovati na Živoj Biblioteci možete učiniti na tri načina: živa knjiga, bibliotekar i čitalac. Upitnici koje možete pronaći u nastavku služe za prijavu kao živa knjiga i bibliotekar. Detaljnija objašnjenja datih uloga su ponuđena u svakom od upitnika.

Potičemo Vas da podržite inicijativu mladih ljudi i budete dio dinamičnog tima.

Unaprijed Vam se zahvaljujemo na izdvojenom vremenu i podršci!

<https://docs.google.com/forms/d/e/1FAIpQLSeLuz2rRXgB1pf5XRL7uX0e5sqF2m7h1vri6GWH0pw8q13xtQ/viewform?fbzx=-6030899406790985087> – prijava za bibliotekara

<https://docs.google.com/forms/d/e/1FAIpQLSfkWBaPDVkpI8sVted7uGuyy0WVVs3q88halMw6aSw0q3C2dg/viewform?fbzx=159933793199044487> – prijava za živu knjigu

### Prijavite se za Konrad Adenauer stipendije



Njemačka fondacija Konrad Adenauer poziva sve zainteresovane da se prijave na konkurs za stipendije za studijsku 2023/2024. godinu namijenjen za društveno i politički angažovane i nadarene studente završnih godina fakulteta, kao i postdiplomcima i doktorandima koji studiraju u Crnoj Gori.

#### OBLAST:

više oblasti

#### OPIS

Konrad-Adenauer-Stiftung je politička fondacija aktivna u cijeloj Njemačkoj i inostranstvu. Njihovo sjedište je u Berlinu, gdje su 1998. otvorili novu lokaciju za događaje, Akademiju, a 2005. ured, koji je još jednom proširen do 2019. Fondacija Konrad-Adenauer razvila se iz Društva za demohrišćansko odgojno-obrazovni rad koje je osnovano davne 1955. godine. Od 1964. godine nosi ime prvog saveznog kancelara Konrada Adenauera.

Izrađuju naučne temelje i najnovije analize koje daju predviđanja za političko djelovanje. Jedna od njihovih ključnih kompetencija je prenošenje političkog obrazovanja šire javnosti. Nadalje, Fondacija Konrad-Adenauer podupire talentirane mlade ljude i zalaže se za književnost, umjetnost i kulturu.

## USLOVI

Kako biste se prijavili za ovu stipendiju potrebno je da:

- Pravo na stipendiju mogu ostvariti studenti od 3. godine studija (od septembra 2023) kao i postdiplomci i doktorandi
- Donja granica prosjeka na studijama je 8.5
- Dobro znanje engleskog ili njemačkog jezika
- Starosna granica kandidata je 30 godina
- Kandidat ne smije biti u radnom odnosu
- Rok za podnošenje prijave je do 9. juna 2023.
- Studenti koji budu izabrani u uži krug biće pozvani na razgovor (na crnogorskom i engleskom jeziku) sa članovima komisije za dodjelu stipendija
- Novčana podrška isplaćuje se izabranim studentima u iznosu od 150 eura mjesečno u trajanju od 10 mjeseci
- Izabrani stipendisti su obavezni da KAS-u dostavljaju dokaz o toku studija a ukoliko stipendista prekine studije, obavezan je da novac vrati KAS-u
- Pored finansijske podrške, stipendistima je omogućeno i pohađanje seminara i drugih aktivnosti u organizaciji KAS-a

## NAČIN PRIJAVE

Kako biste se prijavili potrebno je dostaviti sljedeća dokumenta:

1. popunjen prijavni formular (možete ga preuzeti sa internet stranice vašeg fakulteta ili UCG)
2. CV na engleskom jeziku
3. motivaciono pismo na engleskom jeziku
4. potvrda o položenim ispitima

### \* za POSTDIPLOMSKE / DOKTORSKE STUDIJE

dostavlja se fotokopija diplome sa osnovnih studija i uvjerenje o upisu postdiplomskih / doktorskih studija

5. dvije akademske preporuke
6. jedna preporuka koja se odnosi na politički ili društveni angažman (preporuka iz stranke, NVO ili studentske organizacije – u zavisnosti od vrste angažovanja)
7. fotografija novijeg datuma (format za l.k. ili pasoš)
8. ostale diplome, sertifikati, kopije

Dodatne informacije prilikom apliciranja:

1. Elektronska dostava dokumentacije nije moguća
2. Nepotpuna dokumentacija kandidata se neće razmatrati
3. Po završetku izbora novih stipendista, dokumentacija kandidata se čuva u Fondaciji najduže 3 mjeseca od izbora, kandidat je može preuzeti lično ili mu na zahtjev može biti vraćena poštom
4. Preporuke moraju biti na memorandumu fakulteta i sa potpisom profesora
5. Fondacija Konrad Adenauer u Crnoj Gori ukupno dodjeljuje 9 stipendija godišnje
6. Svi kandidati koji su aplicirali za stipendiju biće obaviješteni o zvaničnim rezultatima konkursa maksimalno 20 dana nakon izbora
7. Kandidati se obavještavaju o rezultatima konkursa putem imejla i ne dostavljaju se pojedinačna obrazloženja zbog kojih kandidat nije primljen u program

## ROK ZA PRIJAVU:

09.06.2023.

## Detaljnije na:

zoran.dabetic@kas.de ili putem telefona na brojeve: 020 246 215, 068 017 228.

## Konkurs za nagradu Šukrija Pandžo 2023.

Tema Gdje su danas roditelji u školi?; jedna osoba može poslati više radova

*Radove možete slati do 30. juna 2023. na adresu [konkurs@skolegijum.ba](mailto:konkurs@skolegijum.ba). Najbolja tri biće nagrađena diplomom i novčanim iznosom. Rezultati će biti krajem avgusta 2023. godine.*



Povodom godišnjice rođenja bosanskohercegovačkog književnika Šukrije Pandže Školegijum raspisuje sedmi po redu konkurs za esej na temu Gdje su danas roditelji u školi?

Od autorica i autora očekujemo da odgovore na pitanja poput: Pomažu ili roditelji školi ili odmažu? Kada je (ako je) njihov doprinos odgoju i obrazovanju konstruktivan, a kada (ako je) destruktivan? Pitaju li se premalo ili previše? Je li njihova uloga precijenjena ili potcijenjena? Prepoznaje li zakon na zadovoljavajući način roditeljska prava? Kako se sudaraju ili

preklapaju roditeljske i nastavničke kompetencije? Odnosi li se reforma školstva i na roditelje? (Nastavite niz...)

Školska praksa je bogata, raznovrsna i zavisi od brojnih specifičnih okolnosti. Jedan od ključnih faktora njenog napretka jeste učešće roditelja. Kakvo je, kakvo bi moglo biti, kakvo ne bi trebalo biti... Šta o tome imate reći kao roditelj, šta kao prosvjetni radnik, šta kao građanin čiji glas definiše obrazovnu politiku i u zavisnosti od nje rezultate obrazovanja.

Pozivamo vas da u formi eseja dužine do 10.000 znakova izložite svoje odgovore na neka od postavljenih ili slična pitanja, pozivajući se na konkretne primjere iz ličnog iskustva ili na istraživanja, studije i članke posvećene ovoj tematici, te na taj način doprinesete nužnoj i kvalitetnoj raspravi o neiskorištenim resursima u odgajanju i obrazovanju onih na kojima svijet ostaje.

Najbolja tri rada biće nagrađena diplomom i novčanim iznosom:

I nagrada 1.000 KM

II nagrada 600 KM

III nagrada 300 KM

Radove možete slati do 30. juna 2023. na adresu [konkurs@skolegijum.ba](mailto:konkurs@skolegijum.ba) sa predmetom „Prijava na konkurs“, i to u nekom od tekstualnih dokumenata (docx, txt, rtf...). Naslov rada mora biti jedinstven i razlikovati se od naslova/teme konkursa.

Jedan autor/jedna autorica može poslati više radova.

Uz svaki rad potrebno je navesti ažurirane kontakt-podatke (ime i prezime, mjesto iz kojeg dolazite, broj telefona). Radovi koji sadrže elemente suprotne [novinarskom kodeksu](#) neće biti objavljeni. Redakcija može u toku odabira najboljih sužavati selekciju, i o tome informisati čitaoc.

Rezultati će biti objavljeni krajem avgusta 2023. godine.

## MEXT stipendije za 2024. godinu



Vlada Japana raspisala je konkurs za stipendije iz MEXT programa stipendiranja (MEXT – Ministarstvo kulture, sporta, obrazovanja, tehnologije i nauke) za 2024. godinu.

Na poziv se mogu prijaviti i studenti iz Bosne i Hercegovine.  
Program obuhvata tri programa stipendija:

1. [Postdiplomski istraživački studiji \(master i doktorske studije\),](#)
2. [Dodiplomske studije \(za studente društvenih, humanističkih ili prirodnih nauka\) i](#)
3. [Tehnološke/tehničke studije.](#)

Rok za prijavu na konkurs je 26. maj tekuće godine, a sve dodatne informacije dostupne su [ovdje](#).



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

**Rok za dostavljanje informacija za svako naredno izdanje je 30-ti u mjesecu.**

Adrese za slanje vaših informacija za mjesečni bilten:

**Omladinski resursni centar Tuzla  
Hadži Bakirbega Tuzlića 1  
75000 Tuzla  
tel/fax: 035 258 077  
e-mail: [orctuzla@bih.net.ba](mailto:orctuzla@bih.net.ba)**

Mjesečni bilten uređuje Omladinski resursni centar - ORC Tuzla

Urednik Biltena:  
**Minela Dohranović**

Prevod Biltena na  
engleski: **Adnan Karamujić**

WEB stranica Mreže:  
**[www.orctuzla.ba](http://www.orctuzla.ba)**

Mejling lista Mreže:  
**[omladina@orctuzla.ba](mailto:omladina@orctuzla.ba)**

Webmaster:  
**[anicic.dev@gmail.com](mailto:anicic.dev@gmail.com)**

ISSN (BHS Varijanta): **2831 – 0845**  
ISSN (Engleski): **2831 0853**